

De stille knip

Cees: Moi, inspecteur.
Inspecteur: Doar wast al weer, mien jong.
Cees: Joa, as verslaggever bin ik toch ofhankelk van de verhalen van mìnsen om mie tou.
Inspecteur: Dat kist natuurlek nait aal zulf bedenken.
Cees: Nee, zo'n dikke doeme heb ik nait en kist dien lezers ook ja gain laigenputereg verhaal veurschuddeln.
Inspecteur: Wat hest doar traauwens in d'buutse.
Cees: Gossiedoagen nog aan tou. Doar zol'k dat ook nog hoast vergeten.
Ik heb joe n fleske drinken mitnomen. n Oardeghaidje.
Inspecteur: En hest hom in d'kraante wikkeld. Dien aigen kraante as pakpepier?
Cees: Ik dus der nait zo mit over stroate lopen.
Inspecteur: O??
Cees: Stel die veur, dat mìnsen zain, dat ik hier n flèze draank mit noar binnen neem. Zai kunnen der wel wat van denken.
Inspecteur: Dat t hier n stille knip is. Bedoulst dat te zeggen?
Cees: n Stille knip. n Gehaime kapperszoak?
Inspecteur: Ik haardie n stok lozer acht. Waist doe nait wat n stille knip is.
Cees: t Ainegste wat ik wait, is dat ik regelmoateg te moaken heb mit n lege knip. n Stille knip zeggen joe?
Inspecteur: Da's n kaffee aan hoes, Cees. n Kaffee zunder vergunnen.
Cees: Woarst aan de boetenkaante nait zain kist, dat ter aan de binnenkaante draank schonken wordt.
Inspecteur: Doe bist reedlek snel van begrip vandoage.
Cees: Dus as ik mien kammeroaden nuig veur n òfzakkertje, den heb ik inains ook n stille knip?
Inspecteur: Nou vaalst mie weer tegen, Cees.
Cees: Haren we zokse stille knippen hier vrouger ook op t dörp.
Inspecteur: Zeker wel.
Cees: En wat zee onze krougholder Janske Holvast doar wel van.
Inspecteur: Dij was doar nait zo bliede mit, mor Janske haar doar verders nik s mit van doun.
Cees: Kwam e nait regelmoateg bie joe kloagen?
Inspecteur: Natuurlek dee e dat, mor doar luusterden wie nait noar. Wie haren as plietsie gewoon onze aigen verantwoorden.
Cees: Mor hou zag zo'n stille knip der van binnen oet.
Inspecteur: Nait aans as bie die thoes.
Cees: Nou begriep ik der nik s meer van. Net zeden ie van nait.
Inspecteur: Luuster, mien jong. Zo'n stille knip wordt aiglieks geboren oet n ekonomiese neudzoak.
Cees: Dus het t wél wat te moaken mit n lege knip?
Inspecteur: In zekere zin wel. Voak hest aan d'aïne kaante mìnsen, dij groag n borreltje luzzzen en dat groag in goud gezelschap op willen drinken en aan d'aander kaante moust n schenker hebben, dij de draank verzörgt.
Cees: En dij der ook beter van wordt.
Inspecteur: Da's dus t probleem. De schenker. Dij schenkt noamelk illegaal.
Cees: En wel wordt hier ekonomies bekeken nou beter van.
Inspecteur: Baaide partijen. De schenker schenkt vèr beneden de pries d'gloaskes vol, mor verdaint ter nog nog oardeg aan en d'manlu drinken duurder as thoes, mor heur borrel oardeg goudkoper as bie Janske.
Cees: d'Manlu zeggen ie. Ist aaltied n mannenzoak?

Inspecteur: Wat stelst toch weer roare vroagen. n Mannenoak! Ik heb in mien laange loopboan nog nooit gain vraauwlu betrappen kind op zokse aktiviteiten.

Cees: Ie zeggen t zo vezichies.

Inspecteur: Ahum... joa. Ik mout dat even goud oetstokken.

Cees: Of perbaaiern ie wat veur mie achter te holden.

Inspecteur: Ik mout oppazen mit die, voaderman. Doe dust die soms veur alsofst nog nait tot tiene tellen kist, mor doe bist ook wel zo'n linkmiegel, dast net dust alsofst doe der niks van snapst. Of zit meneer de verslaggever meschain te visken noar sproakmoakende verhalen.

Cees: Nee, eerlieks woar, ik heb gain idee welke kaante je opwillen.

Inspecteur: Ik geleuf die.

n Joar of wat leden hebben we noamelk de aigender van n stille knip betrapt op ... eh ... nevenactiviteiten. Wie haren hom al n zetje in de goaten, mor dou op zeker mement aal mor meer dikke auto's veur t hoes kwamen te stoan, dou hebben we ain van onze jonge agenten der op òfstuurd.

Cees: Da's handeg. Konden ze votdoadelek zain, dat ze mit n plietsieagent te doun haren.

Inspecteur: Denkst dat wie nait goud gozzel binnen. Onze jongste kellegoa hebben we in zien zundoagse pak der noar tou stuurd.

Cees: In cognito.

Inspecteur: Nee, in zien zundoagse pak. Moust wel goud luustern Cees.

Cees: En hou is e der weer oetkommen?

Inspecteur: Platzak.

Cees: Hebben d'manlu hom doar den op d'kop holden?

Inspecteur: Nee, d'vraauwlu.

Cees: Welke vraauwlu.

Inspecteur: Dij doar waarkten. Onze stille-knip-aigender haar bedocht, dat e noast t schenken van n borreltje, ook wel wat aans in d'aanbaaiden doun kon. Hai docht: d'kirrels binnen toch van hoes en oet t zicht van heur aigen vraauwen, waarom zollen we noast t wientje ook trientje nait op kinnen voeren.

Cees: En dat ging d'plietsie net even te ver, omdat de openboare zeedlekhaid in gevoar kwam.

Inspecteur: Joa.

Cees: Woar zitten ie inains wel mit joen gedachten.

Inspecteur: t Is aal d'schuld van dij figuren mit dij dikke auto's. As dij der nait over tou kommen waren en Boelo zien stille knip ontdekt haren, den haart aal nog wel goud òfopen kind.

Cees: Zol ik, om dij piene n beetje te verzachten, nou mor n zeupie oet mien flèze inschenken?

Inspecteur: Liekt mie goud.

Cees: Proost.

20151020